



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2019. GODINU **HRVATSKE STRANKE PRAVA BIH**

Broj: 03-07-6-300/20  
Sarajevo, 24.08.2021. godine

## SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA.....	4
Predmet pregleda i kontrole .....	4
Cilj pregleda i kontrole .....	4
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1 NALAZI .....	5
5.2 PREPORUKE.....	7

## **MIŠLJENJE REVIZORA**

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatske stranke prava BiH za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2019. godinu, utvrđeno je da je Hrvatska stranka prava BiH prekršila odredbe člana 4. stav (1), člana 5. stav (4), člana 11. stav (1) i člana 12. stav (1) i stav (4) Zakona o finansiranju političkih stranaka.**

**Na osnovu našeg pregleda, odnosno kontrole finansijskog izvještaja, osim gornjih napomena, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatske stranke prava BiH za 2019. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska stranka prava BiH se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	0,00	0,00
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	30.751,80	100,00
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>30.751,80</b>	<b>100,00</b>
<b>II</b>	<b>Ostali prihodi i drugo</b>	<b>0,00</b>	<b>0,00</b>
	<b>Izvori finansiranja (I+II)</b>	<b>30.751,80</b>	<b>100,00</b>

U godišnjem finansijskom izvještaju stranka je iskazala rashode u iznosu od 7.716,93 KM.

## 2. PREDSTAVLJANJE POLITIČKE STRANKE

Naziv političke stranke je Hrvatska stranka prava BiH. Skraćeni naziv je HSP BiH.

Hrvatska stranka prava BiH je registrovana kod Višeg suda u Mostaru Rješenjem broj R: 10/91 od 10.04.1991. godine, te kod Županijskog suda u Širokom Brijegu Rješenjem, broj R: 14/98. Prema podacima Općinskog suda u Širokom Brijegu, stranka je upisana u registar ovog suda pod brojem: 064-0-Reg-07-000572. Rješenjem Općinskog suda u Širokom Brijegu broj: 064-0-F1-17-000001 od 09.05.2017. godine upisana je promjena lica ovlaštenog za zastupanje i predstavljanje stranke.

Sjedište političke stranke je u Ljubuškom, ulica Fra Petra Bakule 7.

Ovlašteno lice za zastupanje stranke u 2019. godini je Nikola Raguž, predsjednik stranke.

Ovlašteno lice za finansijske izvještaje za 2019. godinu je Marko Perić.

Prema podacima iz godišnjeg finansijskog izvještaja za 2019. godinu, Hrvatska stranka prava BiH ima sljedeću organizacionu strukturu:

- Središnji ured.

## 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaji Hrvatske stranke prava BiH za 2019. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenih

zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskog izvještaja Hrvatske stranke prava BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim osvrtom na prihode iz budžeta.

#### **4. PRETHODNE KONTROLE I REVIZIJE**

Pregled i kontrola finansijskih izvještaja Hrvatske stranke prava BiH izvršeni su u periodu od 2005. do 2018. godine, nakon kojih su izdati izvještaji o pregledu sa mišljenjem revizora, nalazima i preporukama revizije.

Nakon izvršenog pregleda godišnjeg finansijskog izvještaja za 2018. godinu, izdat je Izvještaj o pregledu sa mišljenjem revizora, nalazima i preporukama stranci da vodi evidencije o primljenim priložima, da vodi poslovne knjige u skladu sa računovodstvenim propisima, da vodi pravilne evidencije o prihodima, rashodima i obavezama, da u finansijskom izvještaju uključuje sve koristi ostvarene od aktivnosti udruženja koje je povezano sa političkom strankom, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i da podnosi i poseban finansijski izvještaj za period izborne propagande na način kako je utvrđeno Izbornim zakonom Bosne i Hercegovine.

##### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2019. godinu, utvrđeno je da Hrvatska stranka prava BiH nije ispoštovala preporuke revizije.

#### **5. NALAZI I PREPORUKE**

##### **5.1 NALAZI**

##### **a) Hrvatska stranka prava BiH prekršila je odredbe člana 4. stav (1) Zakona o finansiranju političkih stranaka<sup>1</sup>.**

- (1) Hrvatska stranka prava BiH je u Planu utroška sredstava za period od 01.01. do 31.12.2019. godine planirala ukupne rashode u iznosu od 7.700,00 KM. Uvidom u poslovne knjige utvrđeno je da je u 2019. godini stranka ostvarila ukupne rashode u iznosu od 10.074,51 KM.

Pregledom finansijskog izvještaja i finansijske dokumentacije, utvrđeno je da je politička stranka sredstva utrošila mimo svog plana utroška sredstava, kako slijedi:

-Stranka u Planu utroška sredstava nije planirala troškove platnog prometa, troškove donacija i troškove ostalih usluga koje je u 2019. godini ostvarila u ukupnom iznosu od 1.048,93 KM; i

-Stranka je prekoračila troškove knjigovodstvenih usluga za 155,00 KM, a ostale rashode za 3.013,00 KM. Stranka je planirala troškove knjigovodstvenih usluga u iznosu od 500,00 KM, a iste je ostvarila u iznosu od 655,00 KM. U Planu utroška sredstava stranka je planirala ostale rashode u iznosu od 3.000,00 KM, a iste je ostvarila u iznosu od 6.013,00 KM.

Hrvatska stranka prava BiH je finansijska sredstva utrošila mimo utvrđenog Plana utroška sredstava za period 01.01. do 31.12.2019. godine, čime je prekršila odredbe člana 4. stav (1) Zakona o finansiranju političkih stranaka.

- (2) Stranka je u poslovnim knjigama iskazala troškove goriva-putne troškove u iznosu od 1.720,43 KM.

---

<sup>1</sup> Finansijska sredstva iz člana 3. stav (1) Zakona o finansiranju političkih stranaka može koristiti isključivo za ostvarivanje ciljeva utvrđenih svojim programom i statutom.

Stranka je dostavila kopiju fiskalnih računa za izdato gorivo, ali na računima nije navedeno ko je koristio gorivo. Takođe, stranka nije dostavila naloge za službena putovanja niti putne naloge iz kojih bi se utvrdio korisnik, relacija putovanja i pređena kilometraža, te svrha putovanja. Isto tako, prema podacima iz poslovnih knjige stranka u svom vlasništvu nema motorno vozilo, niti zaposlena lica.

Imajući u vidu sve navedeno, nije moguće utvrditi u koju svrhu je utrošeno gorivo, tj. u koju svrhu su utrošena finansijska sredstva stranke.

**b) Hrvatska stranka prava BiH prekršila je odredbe člana 5. stav (4)<sup>2</sup> Zakona o finansiranju političkih stranaka.**

Hrvatska stranka prava BiH nije u poslovnim knjigama i finansijskom izvještaju evidentirala nenovčanu donaciju po osnovu besplatnog korištenja poslovnog prostora, čime je prekršila odredbe člana 5. stav (4) Zakona o finansiranju političkih stranaka.

Uvidom u Izjavu o korištenju poslovnog prostora, broj: 07-01/19 od 07.01.2019. godine, koja je dostavljena na zahtjev Centralne izborne komisije Bosne i Hercegovine, utvrđeno je da je stranka koristila prostor u vlasništvu fizičkog lica bez naknade<sup>3</sup>.

Stranka je korištenjem poslovnog prostora bez plaćanja zakupnine, ostvarila nenovčanu donaciju, koju je u skladu sa odredbama Pravilnika o godišnjim finansijskim izvještajima političkih stranaka i Zakonom o finansiranju političkih stranaka imala obavezu da evidentira u poslovnim knjigama i prijavi u godišnjem finansijskom izvještaju za 2019. godinu.

**c) Hrvatska stranka prava BiH prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.**

Pregledom godišnjeg finansijskog izvještaja, utvrđeno je Hrvatska stranka prava BiH nije u poslovnim knjigama i godišnjem finansijskom izvještaju pravilno iskazala prihode i rashode i nije popunila obrasce godišnjeg finansijskog izvještaja za 2019. godinu u skladu sa odredbama Pravilnika o godišnjim finansijskim izvještajima političkih stranaka (u daljem tekstu: Pravilnik), čime su prekršene odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

(1) Pregledom godišnjeg finansijskog izvještaja, utvrđeno je da Hrvatska stranka prava BiH nije dostavila odštampan obrazac 5 (obaveze političke stranke) godišnjeg finansijskog izvještaja u PDF formatu iz aplikacije FI CIK BiH, ovjeren potpisom ovlaštenog lica i pečatom političke stranke, što je suprotno odredbama člana 3. stav (1) Pravilnika.

(2) Na obrascu 1.1 (Opći podaci o političkoj stranci-teritorijalna organizacija političke stranke) godišnjeg finansijskog izvještaja stranka je navela je da ima samo Središnji ured. Pregledom godišnjeg finansijskog izvještaja, utvrđeno je da je stranka ostvarila prihode iz budžeta Zapadnohercegovačkog kantona i općina Stolac i Posušje, što ukazuje da ima i druge organizacione dijelove.

S obzirom da nije navela podatke o svim organizacionim dijelovima, politička stranka je prekršila odredbe člana 10. Pravilnika.

(3) Stranka u obrascu 2 (pregled prometa svih transakcijskih računa političke stranke) nije iskazala tačne podatke o transakcijskom računu i prometu, čime je prekršila odredbe člana 11. Pravilnika.

Stranka je u obrascu 2 iskazala transakcijski račun broj: 1544802009137017 kod Intesa Sanpaolo banke d.d. BiH sa sljedećim podacima: početno stanje u iznosu od 267,60 KM, ukupan promet

<sup>2</sup> Političke stranke dužne su voditi evidenciju o prijemu članarina i dobrovoljnih priloga, te izdavati potvrde o prijemu članarina i dobrovoljnih priloga.

<sup>3</sup> Vlasnik poslovnog prostora je Zdravko Hršić iz Ljubuškog.

ulaza u iznosu od 30.738,80 KM, ukupan promet izlaza u iznosu od 28.064,51 KM i saldo na dan 31.12.2019. godine u iznosu od 2.941,89 KM.

Pregledom godišnjeg finansijskog izvještaja i druge finansijske dokumentacije, utvrđeno je da je stranka u godišnjem finansijskom izvještaju pogrešno iskazala broj transakcijskog računa. Prema Izvještaju o računima poslovnog subjekta Centralne banke BiH, broj transakcijskog računa stranke kod Intesa Sanpaolo banke d.d. BiH je: 1544802009137014.

Takođe, uvidom u izvode sa transakcijskog računa broj: 1544802009137014 kod Intesa Sanpaolo banke d.d. BiH, utvrđeno je da je početni saldo iznosio 254,60 KM, ukupan promet ulaza iznosio je 30.751,80 KM, ukupan promet izlaza iznosio je 28.064,51 KM i saldo na dan 31.12.2019. godine iznosio je 2.941,89 KM.

- (4) Stranka nije u skladu sa odredbama Zakona o finansiranju političkih stranaka uspostavila evidenciju o nenovčanoj donaciji koju je ostvarila korištenjem poslovnog prostora bez naknade, niti o troškovima zakupnine u istom iznosu, čime je prekršila i odredbe člana 13, 18, 21. i 22. Pravilnika.
- (5) Stranka nije u godišnjem finansijskom izvještaju iskazala tačne podatke o prihodima iz budžeta, čime je prekršila odredbe člana 19. Pravilnika.

U obrascu 3-f (prihodi iz budžeta) stranka je iskazala prihode iz budžeta Grada Ljubuški u iznosu od 26.196,00 KM, Grada Banja Luka u iznosu od 1.071,00 KM i Općine Stolac u iznosu od 3.484,80 KM, odnosno ukupno 30.751,80 KM.

Uvidom u izvode sa transakcijskog računa i podatke koje su dostavili različiti nivoi vlasti, utvrđeno je da je Hrvatska stranka prava BiH ostvarila sljedeće prihode: prihode iz budžeta Federacije Bosne i Hercegovine u iznosu od 18.096,00 KM, prihode iz budžeta Zapadnohercegovačkog kantona u iznosu od 8.100,00 KM, prihode iz budžeta Općine Stolac u iznosu od 3.484,80 KM i prihode iz budžeta Općine Posušje u iznosu od 1.071,00 KM.

- (6) Podaci o rashodima koje je stranka iskazala u godišnjem finansijskom izvještaju ne odgovaraju podacima iz poslovnih knjiga i Završnog računa stranke za 2019. godinu.

Stranka je u poslovnim knjigama i Završnom računu za 2019. godinu iskazala ukupne rashode u iznosu od 10.074,51 KM, i to: troškove sitnog inventara u iznosu od 241,65 KM, troškove platnog prometa u iznosu od 283,60 KM, troškove goriva-putne troškove i maziva u iznosu od 1.720,43 KM, troškove knjigovodstvenih usluga u iznosu od 655,00 KM, troškove reprezentacije u iznosu od 395,50 KM, donacije u iznosu od 500,00 KM, rashode prethodnih godina u iznosu od 6.013,00 KM i ostale usluge u iznosu od 265,33 KM.

Stranka je, međutim, u obrascu 4.1 (režijsko-administrativni i ostali troškovi) godišnjeg finansijskog izvještaja iskazala rashode u ukupnom iznosu od 7.716,93 KM, i to: troškove platnog prometa u iznosu od 283,60 KM, troškove goriva i maziva u iznosu od 265,33 KM, troškove knjigovodstvenih usluga u iznosu od 655,00 KM, donacije pravnim licima u iznosu od 500,00 KM i rashode prethodnih godina u iznosu od 6.013,00 KM.

## 5.2 PREPORUKE

***Preporučuje se Hrvatskoj stranci prava BiH da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:***

- *da vodi evidencije o primljenim priložima,*
- *da vodi poslovne knjige u skladu sa računovodstvenim propisima,*
- *da vodi pravilne evidencije o prihodima i rashodima, i*

- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.*

**KOMENTAR**

U ostavljenom roku, Hrvatska stranka prava BiH nije se očitovala na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2019. godinu.

Šef Odsjeka za revizijske poslove

Sanja Tošović

Pomoćnik revizora

Anela Burdžović Kapić

Šef Službe za reviziju

Mr sc. Hasida Gušić